

O AKADEMIJI

Projekat Akademija za političke lidere/ke ima za cilj da podrži mlade članove/ice političkih partija u vještinama potrebnim za politički i društveni rad i da podrži novu generaciju političara/ki koji će sarađivati u cilju unapređenja njihovih zajednica i društva u cjelini.

Akademija za političke lidere/ke u BiH je namijenjena aktivnim članovima/icama političkih partija, starosti između **18 i 27 godina** koji imaju preporuku i podršku struktura stranke za aktivno učešće na Akademiji.

Program Akademije za političke lidere/ke traje **jednu godinu** (pripremna faza i faza obuke) i uključuje maksimalno 25 polaznika/ca.

PRAVILNIK AKADEMIJE

Akademija za političke lidere/ke u BiH je namijenjena aktivnim mladim političarima/kama starosti između 18 i 27 godina. Osim ovog osnovnog neophodno je da polaznik/ica Akademije položi i **selekcioni test** koji se sastoji iz pitanja opšte kulture, poznavanja političkog sistema BiH i ekonomske i političke situacije u svijetu. Takođe svaki polaznik/ica Akademije mora imati i preporuku zvaničnih struktura svoje stranke (glavnog odbora stranke ili predsjedništva omladinskih struktura u okviru svoje političke partije).

Od polaznika/ca Akademije se očekuje da imaju znanje **engleskog jezika** potrebno za razumijevanje tekstova, da **koriste internet** (pretraga dokumenata i informacija putem interneta) i da **redovno koriste e-mail**.

Kako bi dobili završni sertifikat, polaznici/ce moraju: biti prisutni na najmanje **85% predavanja**, aktivno učestvovati u debatama tokom modula i izvršiti svoje obaveze, prvenstveno izrade seminarskog i praktičnog rada. Svi polaznici će potpisati ugovor sa Perpetuum mobile – Institutom za razvoj mladih i zajednice Banjaluka kojim su definisana prava i obaveze.

Participacija za učešće na Akademiji iznosi 300 KM po polazniku/ci za cijelu godinu. Ona se plaća nakon potpisivanja ugovora i ne vraća se u slučaju da polaznik/ica odustane od Akademije. Participacija se koristi za pokrivanje dijelova troškova Akademije.

Troškove smještaja, hrane, materijala i predavanja snosi Perpetuum mobile – Institut za razvoj mladih i zajednice Banja Luka. Troškove prevoza snose učesnici Akademije.

Po završetku programa obuke, svaki/a od polaznika/ica dobija procjenu svog učešća koja se šalje odgovornoj osobi u političkoj partiji koja je dala preporuku polazniku/ici za učešće u Akademiji.

NAČIN RADA

Akademija za političke lidere/ke u BiH ima karakteristiku u sljedećem:

- *omogućava sticanje vještina potrebnih za politički angažman;*
- *uključuje osnovna teoretska znanja o temama koje su obuhvaćene modulima;*
- *na svakom od modula osim teoretskog, polaznici/ce imaju i praktični dio koji je u vezi sa temom obrađenom tokom modula;*
- *praktični interaktivni rad sa polaznicima/cama, koji poslije Akademije mogu svoja znanja praktično iskoristiti u svom političkom angažmanu;*
- *omogućava polaznicima/cama da čuju aktuelne informacije od kompetentnih predavača/ica.*

Ovaj vid edukacije predviđa i samostalni/timski rad na zadacima kao što je izrada seminarskog i praktičnog rada, koji ima za cilj da motiviše i podstakne polaznika/cu da obradi temu kojom se planiraju baviti u okviru svog političkog angažovanja.

PROGRAM AKADEMIJE

Program Akademije se sastoji iz teorijsko-interaktivnih modula, praktičnog dijela i seminarskog rada, koji svaki/a polaznik/ica treba da prođe da bi dobio/la certifikat Akademije. Moduli su podijeljeni na teme koje su ranije definisane, ali svaki od modula je podložan promjenama u zavisnosti od predznanja studenata/ica i njihovih potreba i interesovanja.

Modul 1 (3 dana) – Mediji, zalaganje i liderstvo

Mediji su danas ključni faktor u kreiranju javnog mnjenja. Kako se izboriti za svoj medijski prostor i kako preko medija poslati snažnu poruku javnosti je okosnica ovog modula Akademije. Međutim, nekad nije dovoljno samo odaslati svoju poruku preko medija i čekati da ona proizvede neke rezultate. Potrebno je razviti modele zalaganja i lobiranja koji će omogućiti da planirana akcija i poruka dobiju podršku nadležnih struktura, a kako se to postiže polaznicima Akademije jepredloženo kroz predavanja o javnom zalaganju i lobiranju.

Ovaj modul naglašava značaj javnog govora i liderstva. Gosti predavači su političari koji će polaznicima prenijeti svoja iskustva kako se ponašati za govornicom i na javnim skupovima i kako se osmišljava kreativan i nadahnut govor. Profesionalci iz oblasti medijske komunikacije i političkog liderstva govoriće polaznicima o tome kako se gradi dobar imidž i šta je sve potrebno imati u vidu kada je riječ o pojavljivanju u javnosti.

Modul 2 (3 dana) - Mladi i diplomatija i evropske integracije

Cilj ovog modula je upravo pojašnjenje djelovanja i nadležnosti BiH institucija, sa posebnim osvrtom na proces evropskih integracija. Teme koje ovaj modul obuhvata su posvećene razvoju Evropske unije, odnosima EU i drugih vodećih svjetskih sila. Reforma javnog sektora u RS i FBiH, kao i međuinstitucionalna komunikacija i javne politike u BiH su teme koje su aktuelne i neophodne u bavljenju javnim i političkim životom i obrađuju se tokom ovog modula. Osim toga veći dio modula se bazira na promociji važnosti učešća mladih u diplomatskim procesima. Predavači na ove teme su eksperti iz nevladinih međunarodnih i lokalnih organizacija, ali prije svega iz institucija koje su zadužene za ova pitanja u Bosni i Hercegovini, kao i predstavnici diplomatskog kora BiH, te druge diplomate u BiH.

Modul 3 (3 dana) - Ljudska prava u BiH, iskustva drugih zemalja u rješavanju sukoba

Način ostvarivanja zaštite ljudskih prava u svim segmentima života je ključno pitanje za razvoj Bosne i Hercegovine i njeno pridruživanje Evropskoj uniji.

Riječi kao što su demokratija, tolerancija i pomirenje izazivaju različite reakcije kod ljudi u BiH. Neki smatraju da su se ove riječi izlizale od pogrešne upotrebe, odnosno zloupotrebe. Ovim modulom želimo da polaznicima/cama ukažemo šta ovi pojmovi znače i šta možemo naučiti iz našeg BiH ratnog iskustva, zatim koji mehanizmi zaštite ljudskih prava su razvijeni kod nas i kako se primjenjuju. Tokom modula se obrađuje i pitanje sudske vlasti u BiH u svjetlu reforme, problema i izazova kroz koje prolazi pravosudni sistem u BiH. Poseban akcent je stavljen na međunarodne norme i konvencije koje je BiH ratifikovala i koje bi trebalo da primjenjuje, kao i na iskustva drugih zemalja koje su se suočavale ili se još uvijek suočavaju sa konfliktnim/ratnim situacijama. Predavači na ovom modulu su politički analitičari i stručnjaci iz oblasti međunarodnog prava.

Modul 4 (3 dana) - Mladi u BiH i regionalna saradnja mladih

Na ovom modulu pojašnjavamo koje su institucije u BiH "zadužene" za mlade, koje su njihove nadležnosti i da li preduzimaju posebne mjere za mlade, kako te institucije komuniciraju sa mladima i koji zakoni u BiH su namijenjeni mladima. Osim toga na ovom modulu polaznici/ce će se detaljno upoznati sa evropskim strukturama za mlade i standardima koji postoje u EU, međunarodnim i evropskim obavezama za mlade koje je preuzela BiH.

Praktičan rad

Svaki/a od polaznika/ca imaju i praktičan zadatak prenošenja stečenog znanja drugim mladim ljudima. Metode i načini prenošenja tog znanja su definisani tokom modula u zavisnosti od vještina i interesovanja svakog polaznika/ice pojedinačno. Neki od načina su organizovanje predavanja na fakultetima u BiH, srednjim školama, skupovima, političkim partijama, NVO.

Seminarski rad

Tokom modula će biti dogovorene aktuelne teme za mlade političare na koje će polaznici pisati seminarske radove. Svaki rad mora da sadrži osnovne elemente i znanja stečena kroz Akademiju. Ovakav način rada omogućuje detaljnu obradu tema u vezi sa mladima i pokretanje rješavanja problema mladih u BiH.

Radovi će biti predstavljeni široj javnosti (univerzitetima u BiH, institucijama BiH, omladinskim organizacijama, političkim partijama) i biće dostupni na našoj web stranici.

Modul 5 (1 dan) – Odbrana seminarskog rada i ceremonija dodjele diploma

Peti modul je ujedno i završnica Akademije, koji se sastoji od radnog dijela, tokom kojeg svi učesnici/ce predstavljaju svoje seminarske i praktične radove i ceremonijalnog dijela gdje se polaznicima/cama Akademije uručuju diplome/certifikati i predstavljaju rezultati programa. Osim studenata, organizatora i predavača na ovaj modul su pozvani i predstavnici obrazovnih institucija, političkih partija, predstavnici vlasti, međunarodnih organizacija.